

02.April. 2019

UPA2019/34

Avammut tunioraaneq pillugu Naalakkersuisunut susasaqartunullu sumulluunniit attuumassuteqanngitsumik nalilersueqqissaarluni inassuteqaasiortartussamik, avammut tunioraaneq pillugu siunnersuisooqatigiinnik kingusinnerpaamik UPA2020-imi pilersitseqqullugit Naalakkersuisut peqquneqarnissaannik siunnersuut. Ilanggullugu siunnersuutigineqarpoq, avammut tunioraernerup siuarsarneqarneranut suliniutit ingerlaavartumik nalilersorneqartarnissaat siunnersuisooqatigiit suliassaannut ilaatinneqassasoq.

(Inatsisartuni ilaasortaq, Karl Kristian Kruse)

Avammut tunioraaneq pillugu sumulluunniit attuumassuteqanngitsumik nalilersueqqissaarluni inassuteqaasiortartussamik, siunnersuisooqatigiinnik kingusinnerpaamik UPA2020-imi pilersitseqqullugit Naalakkersuisut peqquneqarnissaannik siunnersuut. Avammullu tunioraernerup siuarsarneqarneranut ingerlaavartumik nalilersorneqartarnissaat suliassaannut ilaatinniarneqartumut, Siumumiit imaatunik oqaaseqaffigissavagut.

Siullermik siunnersuuteqartumut Karl Kristian Kruse-mut qujavugut, periarfissimmatigut isummersoqataanissatsinnut.

Siunnersuuteqartup tunngavilersuutai aammalu Naalakkersuisut akissuteqaamminni tunngavilersuutaat ersarimmata uteqqinngikkaluarlugit taamaattoq makkuninnga eqqarsaatiseeqataarusuppugut.

Ullumikkut avammut niuverutigeriikkatta pisuussutit uumassullit uumaatsullu aamma siunissami niuverutissatta qanoq iliornikkut naleqarnerulertissinnaanerinik sulissuteqartussanik, avataaniillu eqqussuutagut qanoq iliornikkut akikinnerpaaffianut inissinniarneqarsinnaaneri aamma ataavartumik suliaqartussat suliaanut ilaasariaqartut siumumiit isumaqarfigaagut.

Tassa avammut niuverutigut avataaniillu eqqussuutagut, qanoq iliornikkut assartuinikkullu aqutit pisariillisarneqarsinnaaneri, pisariaqanngitsumillu niuvernikkut assartuinikkullu akunnermiliutut akitsorsaataannaasumik sunniuteqarsinnaasut pinngitsoortinniarlugit suliaqartussanut aamma suliakkiutaasariaqarput, soorlu naluneqarunnaareersoq ilaatigut tamanna pinngitsoortinniarlugu Ral-ip suliniutigalugu aallarereeraa.

Taamatut oqaaseqarluta Siumumiit, siunnersuuteqartup siunnersuutaa oqaaseqaatigut innersuullugit taperserparput pisariaqartitsinerlu naapertorlugu ataatsimiititaliamut susasaqartumut ingerlasinnaanera ammaffigalutigut.

Qujanaq

Henrik Fleischer, Siumut